

10 JAHRE

KERWEBORSCH VUM HESSISCHE HOF

WORFELLE

KERWESPRUCH 1992

Kerwespruch 1992

Seid mer willkumme,
ehr Groade un ehr Krumme,
ehr Dicke un ehr Derre,
ehr Dame un ehr Herre,
ehr Loange un ehr Korze,
ehr Dobbscher un ehr Borzel,
seid mer willkumme, ehr liewe Leit,
endlich is'es jetzt soweit,
die Kerweborsch, ja des es wohr,
die gibt's jetz schunn im zehnte Johr.

20 Johr war mit Kerweborsch nix los,
drum war die Freude riesengroß,
als sich 27 junge Borsch,
vor 10 Johr gonzforsch,
korzerhond dezu entschlosse,
"Mer mache weiter mit dene Bosse,
zur Kerb, des waas ein jedes Kind,
geheern die Kerweborsch, wie die Kuh zum Rind,
denn e Kerb ohne Borsch des es doch blos,
wie Jägerschnitzel ohne Soß!!"

Drum werd desjohr, gonz ohne Fraache,
gefeiert bis die Brie steht in de Aache,
es gonz Ort des es Mischugge,
de Opa duht nur noach de Mädcher gugge,
unser Oma uff Traditione pocht,
om Soamsdog werd Latwerch gekocht,
un die Momme es mit hunnert Sache,
unser Hitt om Sauwer mache,
die Dohnde backt, des glaabt'er nie,
Quetschekuche fer die Kerwekompanie,
un de Bappa, owwends meistens schlapp,
schnappt sich nochemol e grie-weiß Kapp,
so e Jubiläum, des es doch schee,
do muß mer als Worfeller oafach he!!
Un aa die Kerweborsch die soin donn do,
woann's haaßt: **"DIE WORFELLER KERB ESS DO..."**

Es grünt so grün,
wenn Spaniens Blumen blühen,
des honn aa drei Kerweborsch gedacht,
un honn sich uff de Weg gemacht,
doch als se dort unne oagekumme,
stande se do, groad wie die Dumme,
koa Wörtche Spanisch honn se druff
"Ach des kimmt schunn mit'em Suff,
wonn mer mol Oan geloade honn,
babbele mer aa Spanisch donn."
So noch dem Motto frisch, fromm, fröhlich, frei,
de erste Korze honn mer glei,
so honn die Buwe, des soin Koa Bosse,
zwaas Liter Tequilla noigelosse.

Weil des Laafe donn so schwer,
do muß gonz schnell e Taxi her.
In Spaniens Taxis, do werste gehaache,
wenn du moanst du mist Oa raache,
des honn unser Helde net gerafft,
un honn do drin erumgepafft.
De Qualm steig bis unners Dach,
do schlug de Taxifahrer Krach:
"Kippe raus, por favor,
sonst beiß ich dir ins Ohr!"
"Bleib gonz ruhisch, behaal die Nerve,
ich du se aus'em Fenster werfe.
Ach so en Mist, des Ding des klemmt,
jetz honn ich mer die Hond verbrennt!-
Halt mol rechts oh, ich krieg im Suff,
die Scheiß Taxideer net uff!"
De Torsten donn, ei wos en Dabbes,
reißt die Deer uff, schee mit Schmackes,
guckt net noch hinne un net noch vorn,
un haacht'se em Mofafahrer vor de Knornn.
De Mofafahrer war förmlich vun de Socke,
soi Mofa war fast nur noch Brocke,
die Schnut verdrickt, es Gesicht verkratzt,
de gonze Anzuch war net nur verwatzt,
aa vum Wasserfloss do war'er naß,
er liewe Leit hat der en Brass!

Unser Buwe, die honn's mit de Oangst gekriggt,
un honn sich gonz schnell verdrickt,
denn als der Mofafahrer sich erholt,
hät er die zwee gonz gern versohlt.
Drum soach ich eich, jetzt paßt gut uff,
selbst Taxifahrn des sollt'mer net im Suff,
wonn mer zu bleed es, des es zum Lache,
selbststännisch e Taxideer uffzumache!!
Un weil mer Mitleid honn, mit eich Dumme,
do kriggt er jetzt aa Oan gesunge,
un zwar e Lied, des mer schunn vermißt:
"UN ALSEMOAL GESOFFE, UN ALSEMOAL GEPIST..."

Moin Hals es trocke, ich hob en Brond,
drum heb ich jetzt mol korz moi Hond,
un wink moin Mundschenk, ehr liewe Leit,
fer en Schoppe Woi, do es jetz Zeit,
so trink ich jetzt wie es des foi,
en scheene kiehle Schoppe Woi.

Aa wos die Oanern Leit getrewwe,
des honn ich hier korz uffgeschrewwe.
So war des erst vor verzeh Doach,
ich honn gedenkt mich trifft de Schloach,
do wurd e Familiefest gefeiert
weil Oaner vor 25 Jahr geheiert,
owends, wie kennts oannerst soi,
treffe longsom donn die Gäste oi,
mit Geschenke, gute Wünsch, Hunger un aa Dorscht,
zum Esse gibt's donn Schnitzel, Hummer, Kaviar un Worscht,

es werd gefeiert, gesunge un gelacht,
es werd gegesse bis de Gertel kracht,
die Leit soin froh, es hot geschmeckt,
so moancher noach em Schnaps sich streckt.

Im Ort derweil, do sieht mer Oaner schwitze,
der es seit Stunne schunn om flitze,
sucht verzweifelt, ehr lieve Leit,
den Ort, dort wo die Feier steit.
"Ich glaab ich geb'mer glei de Rest,
wo feiert donn de Unkel blos soi Fest?"
Alle Kneipe hat'er obgesucht,
ehr Leit wos hot der Bub geflucht,
er geht hoam springt ins Audo noi,
"Die Feier muß im Bachgrund soi."
Doch Fehllohzeit, die war net dort,
er fährt noch schnell emol dorchs Ort,
do sieht er jo, er konnt's kaum glaawe
e paar Leit dort onnelaafe,
un wie'rer näher kimmt, do sieht er glei,
des es de Kusseng, den froach ich glei:
"Hey Balzer konnst Du mer mol soache,
ich dunn mi'm Suche mich schunn ploache,
ich soin vum Training hoamgekumme,
un honn die Feier net gefunne."
De Thomas hot oagegrinst:
"Koa Wunner daß du uns net finnst!
Net in de Kneip, ich soachs frei raus,
gefeiert werd im Gemoindehaus!"

Tja, Holger, des war e Stick,
iwwer doi kloa Mißgeschick,
mehr hoffe nur, daß du net vergißt,
wo die Worfeller Kerb om scheenste ist,
un daß du waaßt, des soin koa Bosse,
daß mer beim Klinke Kall die Sau rauslosse.
Un daß du's net vergisst, do wern mer garnet mied,
un singe dir es "**ODENWALDLIED**"

Moi Lewwer die duht schunn zucke,
un aa die Zung die es om jucke,
des es fer mich ne klare Sache,
des haast ich muß e Püusje mache.
Drum greif ich mer e Gläsje Woi,
los Kerwespruch mol Kerwespruch jetzt soi,
erheb moi Glas un Prost eich zu,
denn gibt moi Lewwer endlich Ruh.

Oafong August, des hot jeder gespiert,
hot die Feierwehr mol rischdisch rotiert,
geschitt hot's aus alle Oamer,
so gonz trocke blieb do koaner.
Die meiste Keller war geflut,
so monsch Oaner packt do die Wut.
Doch es gibt aa Oannern uff dere Welt,
dene so e Wetter gut gefällt,

do fällt, wie kennt's Oannerst soi,
oam en Haufe Bleedsinn oi:
"Bei so em Reje, ja do renn ich,
fer 15 Mark un 70 Pfennisch,
völlig frei un unbeklemmt,
ohne Hos' un ohne Hemd,
ohne Schtrimp un ohne Schuh,
im'e Tempo wie e Kuh,
vum Monfred bis zur Marie runner,
un zurück dreh ich mitunner,
e Ehrenrund um de Linneboam,
un donn kumm ich erst wirrer Hoam."
Gesacht getan, so gings donn los,
die Stimmung die war riesengroß',
draus gestoanne hoan'se alle,
de Thomas lies die Hülle falle,
"Sprung auf , Marsch, Marsch" in Reje noi,
wos große Pitsche, ja des es foi!
So is'er donn do rumgerennt,
die Leit die klatsche in die Händ,
oannern erschrecke ziemlich schwer,
"Wo kimmt donn bloß der Nackte her?"

Er kam zurick vun soiner Tour,
do guckt er schnell noch uff die Uhr,
springt in soi Klamotte noi,
steckt die siebzeh-fuffzich oi,
rennt zum Monfred mit Horrido,
"Hoste noch paar Biercher do?"
Donn hot'er vun soim erlaafne Geld,
beim Dicke e Kist' Bier bestellt. -
Thomas des war e starkes Stick,
ich honn gedenkt du wärs verrickt,
doch bei de nächste Sitzung, do hob ich glei geseje,
in die Gummizell do brauch mer dich net leje.
Oans des macht mer jetzt noch Soje,
net daß Du mer heit un aa noch Moje,
doi Klamotte leje läßt,
un nackisch gehst zum Kerwefest!!
Un fer dich do singe mer alloa,
doi Lieblingslied: "**BEI UNS OM MOA...**"

Urlaab mache des es schee,
fährst du noach Österreich on en See,
zum Streß vergesse is des ideal,
do soin der doi Soje schießegal.
Om erste Doach do merkste schunn,
vum Himmel brennt gonz schee die Sunn,
entspoanne duhste wie noch nie,
im See rumwaade bis oans Knie,
in de Sunn 'rumleje un sich röste,
des es om Urlaub noch es beste.
Owwends es mer ausgeruht,
do gehts oam wirrer rischtisch gut,
es werd getrunke un gelacht,
donn werd aa noch die Wutz gemacht,
die Sperrstunn die is längst vorbei,
oans zwaa Obstler gehn noch noi,
un weil die Brieh net so gut rutscht,
werd noch schnell e Bier gelutscht.

Bevor mer donn, so gut genährt,
longsom Richtung Heimat fährt.
Im Hotel do leit mer donn im Bett,
"Fer heit do honn mer unser Fett!"
Om nächste Mojend, so um Acht,
de Wecker Kapriole macht,
duhn'se aus ehre Bett raus falle,
"Zum Friehtick gehn mer alle!",
un als es Friehtick war erum,
do schoin schunn bitterbees die Sunn,
doch bevor gefahrn werd on de See,
putz ich mer noch schnell moi Zäh.
Er geht hoch in soi Kabuff,
macht Pasta uff soi Zohberscht druff,
mit Wasser willer schließlich spiehle,
um die haaßgeputzte Zäh zu kiehle,
er nimmt en Schluck, er es oam goile,
duht die Brie im Mund rumwoile,
alles prima duht er denke,
un duht sich glatt de Hals verrenke.

So es dem Siggie des bassiert,
er hot sich net emol rasiert,
soin Kopp der bleib do hinne hänge,
die Schmerze konnt er net verdränge,
es Bade des es ausgefalle,
denn in so 'nem schweren Falle,
legt mer um den festgeklemmte Kopp,
en eisgekühlte Mopp.
De Siggie lies sein Urlaub sause,
um de Hals do trug er donn e Krause. -
Ja so konns geh, wie hier korz glossiert,
wonn de Schluckmuskel net rischtisch funktioniert,
drum rate mir dem Siggie heit,
geh oft Oan trinke, sei Gescheit,
daß doin Hals werd rischtisch fit,
'nem ob un zu aa mol die Traudel mit,
daß sie dich, im Fall der Fälle,
verarzte konn, so uff die Schnelle.
Un fer doin Hals do singe mer gonz schee
"WOANN ICH MOJENDS VUN DE KERB HOAM GEH..."

Vor Oaner Woch' es des bassiert,
wos ich zum Schluß noch korz nodiert.
Fern Fußball schlägt so moanche Brust,
mit Begeisterung un aa voll Lust,
mer fährt so gar, nur um mitzufeiern,
zu em Heimspiel bis noch Bayern.
En Bus werd organisiert,
aa en Fahrer hot mer engagiert,
der ohne das dem des stinkt,
freiwillich koan Alkohol me trinkt,
so sein se losgefahn die Fußballnarrn,
in em gäale Diesel-Diefbaukarrn.
Als des Speel donn aus,
do sein se wieder losgesaut,
doch unnerwegs, do wurd's gonz bitter,
denn der Karrn der schluckt paar Liter,
un ruckzuck, eh se sich verseje,

blieb die Kiste uff de Stelle steje.
 Koan Droppe Sprit im Tonk,
 doch veelleicht gibts jo Gott sei Donk,
 noch en Ersatzkanister hinne droi,
 mit 4, 5 Liter Diesel droi.
 Doch Fehllohzeich, koan Sprit meh do,
 "Ehr Buwe schiebt moal hinne oa!"
 So wurd geschoowe, Buckel nuff un Buckel nunner,
 bis om nächste Parkplatz, ja wos e Wunner,
 en Tscheche-LKW wurd gesicht,
 der Fahrer macht veelleicht e Gesicht,
 doch hot der gute Moann,
 geholfe so gut er koann,
 hot Sprit spendiert, des war doch nett,
 doch ogesprunge is er trotzdem net.
 Wonn de Diesel Luft zieht, des es halt so,
 donn springt des Sauding net meh oh.
 Der Hermonn schillt: "Des es doch Scheiße,
 des es jo grod zum Arsch uffreiße!
 Ich ruf jetzt so orrer so,
 vun hier de ADAC glei o."
 Der kam recht schnell, in 'rer halwe Stunn,
 die Worfeller die saße ziemlich bleed erum,
 donn hot der Monn vum ADAC,
 ehr Leit wos war des Schee,
 mit drei Spritzer Startpilot,
 die Fußballfans erlöst vun ehre Not.

Ehr Dolle wos soll ich do noch soache,
 es Schicksal hot eich genung geschloache,
 doch merkt eich jetz fer alle Zeit,
 die Tonkuhr, des wisse alle Leit,
 kann nur de Fahrer kontrolliern,
 fer die Reserve jedoch, do mißt er eich notiern,
 muß der Halter, fer alle Fälle,
 en Reservekanister stelle.
 Un zum gute Schluß,
 do richt ich noch en Gruß,
 on de Voise-Peter des Kamel,
 dem de Reservekanister fehlt.
 Un zur Versöhnung singe mehr aus voller Brust:
"DAS WANDERN IST DES MÜLLERS LUST..."

Ehr Leit fer desjohr honn ich jetz genuch,
 er geht Zuend der Kerwespruch,
 moi Zung die es schunn gonz verdreht,
 die KääL die es zu schlecht geelt,
 aa unsern Kerwewatz dem daabe Dier,
 hängt die Zung noch'em kiehle Bier,
 un aa die Kerweborsch die kenne net meh steh,
 es werd Zeit, mer misse weiter geh.
 Zum Schluß do zieh ich noch moin Hut,
 "Auf Wiedersehn, un Tschüß, macht's gut!
 Mer seje uns heit Owend wirrer,
 ich load Eich oi, kummt alle riwwer,
 bei uns es heit de Deiwel los,
 mer feiern all, ob Kloa ob Groß,
 mer klatsche, mer singe un soin froh,
 woanns haabst: **"DIE WORFELLER KERB ES DO..."**